

Na osnovu člana 89. stava 3. Zakona o kretanju i boravku stranaca i azilu ("Sl.glasnik BiH" broj 29/03, 4/04 i 53/07) i člana 16. Zakona o upravi ("Sl.glasnik BiH" broj 32/02) Ministar vanjskih poslova Bosne i Hercegovine donosi

P R A V I L N I K

o uslovima i načinu izdavanja posebnih identifikacijskih dokumenata (Identifikacijske iskaznice) po osnovu službovanja u diplomatskim i konzularnim predstavništvima i predstavništvima međunarodnih organizacija u Bosni i Hercegovini

DIO PRVI – UVOD

Član 1.

(Predmet)

(1) Ovim pravilnikom uređuju se uslovi, postupak izdavanja, izgled, izrada, obrasci i način vođenja evidencije posebnih identifikacijskih dokumenata – Identifikacijske iskaznice, koji se izdaju članovima diplomatskih i konzularnih predstavništava (u daljem tekstu: član diplomatsko - konzularnog predstavništva); članovima privatne posluge; članovima organizacija Ujedinjenih nacija i drugih specijalizovanih ustanova UN, te međunarodnih organizacija akreditovanih u Bosni Hercegovini (u daljem tekstu: diplomatsko i konzularno predstavništvo i predstavništvo međunarodne organizacije), kao i članovima njihovih porodica odnosno članovima zajedničkog domaćinstva.

Član 2.

(Definicije)

Sljedeće definicije vrijede za izraze u ovom pravilniku:

- a) «Diplomatsko predstavništvo» označava sva predstavništva koja su od strane drugih zemalja u skladu sa odredbama Bečke konvencije o diplomatskim odnosima iz 1961. godine, otvorena u Bosni i Hercegovini;
- b) «Konzularno predstavništvo» označava svaki generalni konzulat, konzulat, vice-konzulat ili konzularnu agenciju koji su od strane drugih zemalja u skladu sa odredbama Bečke konvencije o konzularnim odnosima iz 1963. godine, otvoreni u Bosni i Hercegovini;
- c) «Predstavništvo međunarodne organizacije» označava sva predstavništva organizacija Ujedinjenih nacija, specijalizovanih ustanova UN i drugih međunarodnih organizacija koje se, u skladu sa međunarodnim ugovorima koji obavezuju Bosnu i Hercegovinu, nalaze u Bosni i Hercegovini;
- d) «član diplomatskog predstavništva» označava članove diplomatskog predstavništva u skladu sa odredbama Bečke konvencije o diplomatskim odnosima iz 1961. godine;

e) «član konzularnog predstavništva» označava članove konzularnog predstavništva u skladu sa odredbama Bečke konvencije o konzularnim odnosima iz 1963. godine;

f) «član predstavništva međunarodne organizacije » označava sve članove predstavništva koji su u tom svojstvu akreditovani i notifikovani i čiji imunitet i privilegije su utvrđeni u skladu sa odredbama Konvencije o privilegijama i imunitetima organizacije Ujedinjenih nacija iz 1946. godine, Konvencije o privilegijama i imunitetima specijalizovanih ustanova iz 1947. godine i drugim međunarodnim ugovorima koji obavezuju Bosnu i Hercegovinu.

g) «član porodice» označava supružnika i djecu člana diplomatskog i konzularnog predstavništva i predstavništva međunarodne organizacije čiji je dolazak notifikovan od strane diplomatskog i konzularnog predstavništva i predstavništva međunarodne organizacije i čiji imunitet je utvrđen u skladu sa odredbama Bečkih konvencija o diplomatskim i konzularnim odnosima iz 1961. i 1963. godine, Konvencijom o privilegijama i imunitetima organizacije Ujedinjenih nacija iz 1946. godine, Konvencijom o privilegijama i imunitetima specijalizovanih ustanova iz 1947. godine i drugim međunarodnim ugovorima koji obavezuju Bosnu i Hercegovinu;

h) «Ministarstvo» označava Ministarstvo vanjskih poslova Bosne i Hercegovine.

DIO DRUGI – IZDAVANJE IDENTIFIKACIJSKE ISKAZNICE

GLAVA I

Odjeljak A. Notifikacija i nadležnost

Član 3.

(Notifikacija novog člana diplomatskog i konzularnog predstavništva i predstavništva međunarodne organizacije u Bosni i Hercegovini)

Diplomatsko i konzularno predstavništvo i predstavništvo međunarodne organizacije u Bosni i Hercegovini treba notifikovati Ministarstvu vanjskih poslova Bosne i Hercegovine (u daljnjem tekstu: Ministarstvo) nove članove i članove njihove porodice po njihovom dolasku u Bosnu i Hercegovinu.

Član 4.

(Nadležnost i svrha izdavanja identifikacijske iskaznice)

Na osnovu notifikacije iz člana 3. ovog pravilnika, Ministarstvo izdaje odgovarajuću identifikacijsku iskaznicu, kojom se potvrđuje identitet i status njenog nosioca u skladu sa Bečkim konvencijama o diplomatskim i konzularnim odnosima iz 1961. i 1963. godine, Konvencijom o privilegijama i imunitetima Ujedinjenih nacija iz 1946. godine, Konvencijom o privilegijama i imunitetima specijalizovanih ustanova iz 1947. godine i međunarodnim ugovorima koji obavezuju Bosnu i Hercegovinu.

GLAVA II

Odjeljak B. Tipovi

Član 5.

(Tipovi identifikacijske iskaznice)

Identifikacijske iskaznice koje izdaje Ministarstvo, su sljedeće:

- a) tip «D»
- b) tip «MO»
- c) tip «K»
- d) tip «S»
- e) tip «PO»
- f) tip «PK»
- g) tip «PP»

Član 6.

(Identifikacijska iskaznica tip «D»)

Identifikacijska iskaznica tipa «D» izdaje se strancu, članu diplomatskog predstavništva, nosiocu diplomatskog pasoša zemlje šiljateljice, koji u skladu sa Bečkom konvencijom o diplomatskim odnosima iz 1961. godine, uživa status diplomatskog agenta, i članovima njegove porodice koji su nosioci diplomatskog pasoša.

Član 7.

(Identifikacijska iskaznica tip «MO»)

Identifikacijska iskaznica tipa «MO» izdaje se strancu, šefu, zamjeniku i osoblju organizacija Ujedinjenih naroda i specijalizovanih ustanova Ujedinjenih nacija, te drugih međunarodnih organizacija u Bosni i Hercegovini kojima je međunarodnim ugovorima koji obavezuju Bosnu i Hercegovinu dat imunitet diplomatskog agenta, i članovima njihovih porodica, bez obzira na vrstu pasoša.

Član 8.

(Identifikacijska iskaznica tip «K»)

Identifikacijska iskaznica tipa «K» izdaje se strancu, konzularnom funkcioneru koji je nosilac diplomatskog pasoša i koji, u skladu sa Bečkom konvencijom o konzularnim odnosima iz 1963. godine, uživa status konzularnog funkcionera, kao i članovima njegove porodice koji su nosioci diplomatskog pasoša.

Član 9.

(Identifikacijska iskaznica tip «S»)

Identifikacijska iskaznica tipa «S» izdaje se strancu, članu administrativno - tehničkog osoblja diplomatskog predstavništva, službeniku konzularnog predstavništva, članu predstavništva organizacija Ujedinjenih nacija i specijalizovanih ustanova UN, članu predstavništva međunarodne organizacije akreditovanom u Bosni i Hercegovini i članovima njihovih porodica, u skladu sa Bečkom konvencijom o diplomatskim odnosima iz 1961. godine, Bečkom konvencijom o konzularnim odnosima iz 1963. godine, Konvencijom o privilegijama i imunitetima Ujedinjenih nacija iz 1946. godine, Konvencijom o privilegijama i imunitetima specijalizovanih ustanova iz 1947. godine i međunarodnim ugovorima koji obavezuju Bosnu i Hercegovinu.

- a) Članu administrativno – tehničkog osoblja diplomatskog predstavništva i službeniku konzularnog predstavništva i članovima njihovih porodica iz stava (1) ovog člana, identifikaciona iskaznica izdaje se samo nosiocu službenog pasoša,
- b) Članu predstavništva organizacija Ujedinjenih nacija i specijalizovanih ustanova UN, članu predstavništva međunarodne organizacije i članovima njihovih porodica iz stava (1) ovog člana, identifikaciona iskaznica izdaje se bez obzira na vrstu pasoša.

Član 10.

(Identifikacijska iskaznica tip «PO»)

Identifikacijska iskaznica tipa «PO» izdaje se strancu, članu poslužnog osoblja diplomatskog i konzularnog predstavništva, bez obzira na vrstu pasoša, a u skladu sa Bečkim konvencijama o diplomatskim i konzularnim odnosima iz 1961. i 1963. godine.

Član 11.

(Identifikacijska iskaznica tip «PK»)

Identifikacijska iskaznica tipa «PK» izdaje se počasnom konzularnom funkcioneru koga je Bosna i Hercegovina prihvatila za obavljanje te dužnosti, a u skladu sa Bečkom konvencijom o konzularnim odnosima iz 1963. godine.

Član 12.

(Identifikacijska iskaznica tip «PP»)

Identifikacijska iskaznica tipa «PP» izdaje se strancu, članu privatne posluge člana diplomatskog ili konzularnog predstavništva u Bosni i Hercegovini, bez obzira na vrstu pasoša, a na osnovu notifikacije diplomatskog, odnosno konzularnog predstavništva u Bosni i Hercegovini, isključivo primjenom načela reciprociteta.

Odjeljak C. Djeca i vanbračni partner

Član 13.

(Izdavanje identifikacijske iskaznice djeci notifikovanih osoba)

- (1) Identifikacijska iskaznica se izdaje djeci notifikovane osobe, starosti do 18 godina.
- (2) Izuzetno djeca notifikovane osobe, koja su na redovnom školovanju u Bosni i Hercegovini, uz priloženu potvrdu nadležne ustanove, mogu biti nosioci identifikacijske iskaznice najduže do navršene 26. godine starosti.
- (3) Djeci notifikovane osobe, nad kojima je odlukom nadležnog organa produženo roditeljsko staranje, identifikacijska iskaznica se izdaje bez obzira na starost.

Član 14.

(Izdavanje identifikacijske iskaznice članovima vanbračne zajednice notifikovanih osoba)

Identifikacijska iskaznica se može izdati i strancu, vanbračnom partneru primarnog nosioca prava iz člana 6., 7., 8., i 9. ovog pravilnika, ako s njim živi u vanbračnoj zajednici i ako vanbračnu zajednicu priznaje država šiljateljica.

GLAVA III

Odjeljak D. Podnošenje zahtjeva i rok važenja

Član 15.

(Podnošenje zahtjeva za izdavanje identifikacijske iskaznice)

- (1) Diplomatsko i konzularno predstavništvo i predstavništvo međunarodne organizacije u Bosni i Hercegovini, prilikom notifikacije prilaže:
 - a) Verbalnu notu;
 - b) Fotokopiju pasoša (i original pasoša na uvid) osobe koja se notifikuje;
 - c) Jednu fotografiju u boji, veličine 3 x 3,5 cm;
 - d) Ispunjeni obrazac zahtjeva potvrđen od strane rukovodioca diplomatskog, konzularnog predstavništva ili predstavništva međunarodne organizacije i potpisan od strane notifikovane osobe za koju se izdavanje identifikacijske iskaznice traži.
- (2) Ministarstvo u pasoš osobe koja se notifikuje otiskuje prijemni štambilj slijedećeg sadržaja: «Stavljeno na uvid Ministarstvu vanjskih poslova Bosne i Hercegovine», slijedi datum otiska, potpis ovlaštene osobe i mali pečat Ministarstva vanjskih poslova Bosne i Hercegovine.

Član 16.

(Važnost identifikacijske iskaznice)

- (1) Identifikacijska iskaznica važi kao dozvola privremenog boravka stranca u Bosni i Hercegovini i izdaje se s rokom važenja od 4 (četiri) godine, odnosno do datuma važenja pasoša ukoliko je rok isticanja važenja pasoša kraći.
- (2) Nova identifikacijska iskaznica izdaje se u ovisnosti o dužini trajanja prethodne, kao i o datumu važenja pasoša, s tim da ne može preći rok važenja od 4 (četiri) godine.
- (3) Period važnosti identifikacijske iskaznice člana porodice nosioca odgovarajuće funkcije ne može biti duži od roka važnosti identifikacijske iskaznice primarnog nosioca prava.
- (4) Nosioc identifikacijske iskaznice nema obavezu pribavljanja vize za ulazak i odobrenja za boravak u Bosni i Hercegovini.
- (5) Osobe iz članova 6., 7., 8., 9., 10., 11. i 12. ovog pravilnika mogu imati samo jednu važeću identifikacijsku iskaznicu.

Član 17.

(Prestanak važnosti identifikacijske iskaznice prije isteka perioda na koji je izdana)

- (1) Identifikacijska iskaznica će se vratiti prije isteka perioda na koji je izdana, u slučaju:
 - a) da nosiocu identifikacijske iskaznice prestaje službovanje;
 - b) da se nosiocu identifikacijske iskaznice promijeni status;
 - c) da je nosilac identifikacijske iskaznice proglašen nepoželjnom osobom;
 - d) da postoji osnovana sumnja da se identifikacijska iskaznica ne upotrebljava u skladu sa namjenom radi koje je izdana.
- (2) Diplomatsko i konzularno predstavništvo ili predstavništvo međunarodne organizacije u slučaju iz tačke a), b) i c) stava (1) ovog člana identifikacijsku iskaznicu je dužno diplomatskim putem dostaviti Ministarstvu u roku od osam dana, računajući od dana kada je nastao razlog iz stava (1) ovog člana.
- (3) Identifikacijske iskaznice iz stava (1) ovog člana Ministarstvo poništava.
- (4) Identifikacijska iskaznica se poništava bušenjem.
- (5) Ukoliko se naknadno utvrdi da je identifikacijska iskaznica izdana protivno uslovima utvrđenim ovim pravilnikom ili da postoje razlozi iz tačke d) stava (1) ovog člana, ista će se na zahtjev vratiti Ministarstvu i poništiti na način predviđen u stavu (4) ovog člana.
- (6) Ministarstvo će o poništenju identifikacijske iskaznice obavijestiti odgovarajuće diplomatsko i konzularno predstavništvo, odnosno predstavništvo međunarodne organizacije.

Član 18.

(Izdavanje nove identifikacijske iskaznice)

(1) Prije isteka perioda važenja identifikacijske iskaznice izdaće se nova u slučaju:

- a) da su promijenjeni podaci o nosiocu identifikacijske iskaznice, koji su sastavni dijelovi njenog sadržaja;
- b) da fotografija više ne prikazuje pravu sliku nosioca identifikacijske iskaznice;
- c) da je identifikacijska iskaznica oštećena ili ukoliko iz nekog drugog razloga nije više moguće njeno korištenje;
- d) da je identifikacijska iskaznica ukradena, izgubljena ili nestala.

(2) U slučajevima iz tačke a), b) i c) stava (1) ovog člana diplomatsko i konzularno predstavništvo ili predstavništvo međunarodne organizacije vraća prvobitnu identifikacijsku iskaznicu i podnosi zahtjev za izdavanje nove identifikacijske iskaznice.

(3) U slučaju iz tačke d) stava (1) ovog člana diplomatsko i konzularno predstavništvo ili predstavništvo međunarodne organizacije o nestanku, krađi ili gubitku identifikacijske iskaznice obavještava Ministarstvo.

a) Ministarstvo o nestanku, krađi ili gubitku identifikacijske iskaznice obavještava nadležno ministarstvo unutrašnjih poslova.

b) Ministarstvo donosi rješenje o proglašenju nestale, izgubljene ili ukradene identifikacijske iskaznice nevažećom.

(4) Uz zahtjev za izdavanje nove identifikacijske iskaznice u slučaju iz tačke d) stava (1) ovog člana, diplomatsko i konzularno predstavništvo ili predstavništvo međunarodne organizacije je dužno priložiti dokaz nadležne institucije o oglašavanju nevažećom izgubljene, ukradene ili nestale identifikacijske iskaznice.

a) Nadležna institucija Bosne i Hercegovine za oglašavanje nevažećom nestale, izgubljene ili ukradene identifikacijske iskaznice iz tačke d) stava (1) ovog člana, je Službeni glasnik Bosne i Hercegovine.

Član 19.

(Imunitet i privilegije nosioca identifikacijske iskaznice)

Imunitet i privilegije nosioca identifikacijske iskaznice iz člana 6., 7., 8., 9., 10., i 11. ovog pravilnika priznati su u skladu sa Bečkim konvencijama o diplomatskim i konzularnim odnosima iz 1961. i 1963. godine, odnosno Konvencijom o privilegijama i imunitetima Ujedinjenih nacija iz 1946. godine, Konvencijom o privilegijama i imunitetima specijalizovanih ustanova iz 1947. godine i međunarodnim ugovorima koji obavezuju Bosnu i Hercegovinu.

a) Imunitet i privilegije osobe iz člana 6., 7., 8., 9., i 10. ovog pravilnika koje ima dvojno državljanstvo priznaje se samo na bazi reciprociteta.

Član 20.

(Notifikacija prestanka obavljanja dužnosti u Bosni i Hercegovini)

(1) Diplomatsko i konzularno predstavništvo i predstavništvo međunarodne organizacije u Bosni i Hercegovini notifikuje Ministarstvu, odlazak svojih članova – prestanak obavljanja dužnosti u Bosni i Hercegovini.

(2) Diplomatsko i konzularno predstavništvo i predstavništvo međunarodne organizacije u Bosni i Hercegovini dužno je vratiti identifikacijsku iskaznicu člana čiji se odlazak notifikuje i članova njegove porodice na način utvrđen članom 17. stav (2) ovog pravilnika.

(3) Novom članu diplomatskog i konzularnog predstavništva ili predstavništva međunarodne organizacije i članovima njegove porodice, identifikacijska iskaznica neće biti izdana u slučaju nepodržavanja odredbi iz stava (2) ovog člana.

Član 21.

(Zaštita podataka)

Tokom postupanja po zahtjevu za izdavanje identifikacijske iskaznice Ministarstvo mora osigurati zaštitu ličnih podataka u skladu sa odgovarajućim odredbama Zakona o zaštiti ličnih podataka.

GLAVA IV

Odjeljak E. Identifikacijska iskaznica i obrasci

Član 22.

(Izgled identifikacijske iskaznice)

1) Identifikacijska iskaznica se izdaje na plastičnoj kartici dimenzije 5,5 x 8,5 cm, koja ima ugrađene sigurnosne i zaštitne elemente.

(2) Boja identifikacijske iskaznice je bijela sa svijetlo plavim prugama koje su po obodu gušće raspoređene.

(3) Na prednjoj strani identifikacijske iskaznice nalazi se:

a) Naziv Bosna i Hercegovina;

b) Grb Bosne i Hercegovine;

- c) Fotografija nosioca identifikacijske iskaznice;
- d) Potpis nosioca identifikacijske iskaznice;
- e) Naziv identifikacijska iskaznica s oznakom tipa: «D», »MO», »K», »S», »PO», »PK» ili »PP» zavisno o kojem tipu identifikacijske iskaznice se radi;
- f) Prezime nosioca identifikacijske iskaznice;
- g) Ime nosioca identifikacijske iskaznice;
- h) Naziv funkcije koju nosilac identifikacijske iskaznice ima;
- i) Naziv diplomatskog ili konzularnog predstavništva ili predstavništva međunarodne organizacije koje je notifikovalo nosioca identifikacijske iskaznice;
- j) Datum izdavanja identifikacijske iskaznice;
- k) Datum važenja identifikacijske iskaznice;
- l) Serijski broj identifikacijske iskaznice.

(4) Na zadnjoj strani identifikacijske iskaznice nalazi se:

a) Tekst koji označava obim imuniteta koje nosilac identifikacijske iskaznice uživa, naznaku da nosilac identifikacijske iskaznice ne treba vizu ili dozvolu boravka u Bosni i Hercegovini i da nadležni organi u Bosni i Hercegovini poštuju imunitet i privilegije koje nosilac identifikacijske iskaznice uživa;

b) Naziv organa koji je izdao identifikacijsku iskaznicu.

(5) Zaštitni elementi identifikacijske iskaznice su u skladu sa standardima izdavanja identifikacijskih iskaznica.

(6) Tekst na identifikacijskoj iskaznici je štampan na tri službena jezika koja su u upotrebi u Bosni i Hercegovini, latiničnim i ćiriličnim pismom, i na engleskom jeziku, osim teksta na zadnjoj strani koji je namijenjen nadležnim organima u Bosni i Hercegovini, koji je štampan na tri službena jezika koja su u upotrebi u Bosni i Hercegovini, latiničnim i ćiriličnim pismom.

(7) Raspored sadržaja identifikacijske iskaznice na plastičnoj kartici je utvrđen u aneksu I ovog pravilnika.

Član 23.

(Tekst na zadnjoj strani identifikacijske iskaznice namijenjen nadležnim organima u Bosni i Hercegovini)

Tekst na zadnjoj strani identifikacijske iskaznice, namijenjen nadležnim organima u Bosni i Hercegovini, različit je zavisno od tipa identifikacijske iskaznice, odnosno obima imuniteta za:

- a) identifikacijsku iskaznicu tipa "D" glasi: “Nosilac ove identifikacijske iskaznice uživa imunitet diplomatskog agenta i ne smije biti uhapšen ili pritvoren. Nosilac identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa.”
- b) identifikacijsku iskaznicu tipa "MO" glasi: “Nosilac ove identifikacijske iskaznice uživa imunitet diplomatskog agenta. Nosilac identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa.”
- c) identifikacijsku iskaznicu tipa "K" glasi: “Nosilac ove identifikacijske iskaznice uživa imunitet od sudskog postupka i ne smije biti uhapšen ili pritvoren, osim u slučaju teškog krivičnog djela i to samo na osnovu odluke nadležnog suda. Nosilac identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa.”
- d) identifikacijsku iskaznicu tipa "S" glasi: “Nosilac ove identifikacijske iskaznice uživa imunitet od sudskog postupka za djela učinjena tokom vršenja dužnosti koju obavlja. Nosilac identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa.”
- e) identifikacijsku iskaznicu tipa "PO" glasi: “Nosilac ove identifikacijske iskaznice uživa imunitet za djela učinjena u vezi izvršenja svoje dužnosti. Nosilac identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa.”
- f) identifikacijsku iskaznicu tipa "PK" glasi: “Nosilac ove identifikacijske iskaznice ima status počasnog konzula u BiH. Stranac nosilac ove identifikacijske iskaznice ne treba imati vizu ili dozvolu boravka u BiH. Mole se nadležni organi da poštuju imunitet i privilegije koje nosilac ove identifikacijske iskaznice uživa”
- g) identifikacijsku iskaznicu tipa "PP" glasi: “Nosilac ove identifikacijske iskaznice ne uživa imunitet i privilegije. Nosilac ove identifikacijske iskaznice ne treba imati vizu ili dozvolu boravka u BiH.”

Član 24.

(Obrazi zahtjeva za izdavanje identifikacijske iskaznice)

(1) Obrazac zahtjeva za izdavanje identifikacijske iskaznice je štampan na formatu A4 i u ovisnosti od tipa identifikacijske iskaznice čije se izdavanje traži sadrži:

a) Obrazac broj 1 kojim se traži izdavanje identifikacijske iskaznice tip «D», »MO», «K», «S», «PO» i «PK» sadrži: podatke o tipu identifikacijske iskaznice čije se izdavanje traži; podatke o diplomatskom i konzularnom predstavništvu i predstavništvu međunarodne organizacije za čijeg člana se traži izdavanje identifikacijske iskaznice; lične podatke i podatke o privatnoj adresi člana diplomatskog i konzularnog predstavništva i predstavništva međunarodne organizacije za koga se traži izdavanje identifikacijske iskaznice; podatke o putnoj ispravi; podatke o razlozima za izdavanje identifikacijske iskaznice; podatke o dokumentima koje je potrebno priložiti uz zahtjev; potpis rukovodioca predstavništva; potpis člana predstavništva za kojeg se izdavanje identifikacijske iskaznice traži; podatke o izdanoj identifikacijskoj iskaznici; potpis službene osobe Ministarstva koja je odobrila izdavanje identifikacijske iskaznice i potpis službene osobe Ministarstva koja je uručila identifikacijsku iskaznicu.

1) Obrazac broj 1 sadržan je u aneksu II ovog pravilnika;

b) Obrazac broj 2 kojim se traži izdavanje identifikacijske iskaznice za članove porodice nosioca identifikacijske iskaznice tip «D», »MO», «K» ili «S» sadrži: podatke o tipu identifikacijske iskaznice čije se izdavanje traži; podatke o diplomatskom i konzularnom predstavništvu i predstavništvu međunarodne organizacije osnovnog nosioca za čije članove porodice se traži izdavanje identifikacijske iskaznice; lične podatke i podatke o privatnoj adresi člana porodice osnovnog nosioca identifikacijske iskaznice; podatke o razlozima za izdavanje identifikacijske iskaznice; podatke o članu diplomatskog i konzularnog predstavništva i predstavništva međunarodne organizacije osnovnog nosioca identifikacijske iskaznice; podatke o dokumentima koje je potrebno priložiti uz zahtjev; potpis rukovodioca predstavništva; potpis člana porodice za kojeg se izdavanje identifikacijske iskaznice traži; podatke o izdanoj identifikacijskoj iskaznici; potpis službene osobe Ministarstva koja je odobrila izdavanje identifikacijske iskaznice i potpis službene osobe Ministarstva koja je uručila identifikacijsku iskaznicu.

2) Obrazac broj 2 sadržan je u aneksu III ovog pravilnika;

c) Obrazac broj 3 kojim se traži izdavanje identifikacijske iskaznice tip «PP» sadrži: podatke o diplomatskom i konzularnom predstavništvu koje notifikuje osobu kao privatnu posluhu za potrebe svoga člana; lične podatke o osobi koja se notifikuje kao privatna posluga; podatke o članu diplomatskog i konzularnog predstavništva kod koga je angažovana privatna posluga; podatke o razlozima izdavanja identifikacijske iskaznice; podatke o dokumentima koje je potrebno priložiti uz zahtjev; potpis rukovodioca diplomatskog i konzularnog predstavništva, potpis člana privatne posluge za kojeg se izdavanje identifikacijske iskaznice traži; potpis službene osobe Ministarstva koja je odobrila izdavanje identifikacijske iskaznice i potpis službene osobe Ministarstva koja je uručila identifikacijsku iskaznicu.

3) Obrazac broj 3 sadržan je u aneksu IV ovog pravilnika.

(2) Istinitost podataka datih u obrascu kojim se traži izdavanje identifikacijske iskaznice za notifikovanog člana diplomatskog i konzularnog predstvaništva ili predstavništva međunarodne organizacije, svojim potpisom na obrascu potvrđuje rukovodilac diplomatskog i konzularnog predstvaništva ili predstavništva međunarodne organizacije.

(3) Obrazac kojim se traži izdavanje identifikacijske iskaznice potpisuje i notifikovani član diplomatskog i konzularnog predstvaništva ili predstavništva međunarodne organizacije, za koga se izdavanje identifikacijske iskaznice traži.

(4) Službena osoba Ministarstva, potpisom na obrascu potvrđuje uručenje identifikacijske iskaznice notifikovanom članu diplomatskog i konzularnog predstvaništva ili predstavništva međunarodne organizacije.

(5) Obrasci iz stava (1) ovog člana štampani su na tri službena jezika koja su u upotrebi u Bosni i Hercegovini, latiničnim i ćirilničnim pismom i na engleskom jeziku.

Član 25.

(Obrazac kojim se vrši povrat identifikacijske iskaznice)

(1) Obrazac broj 4 za povrat identifikacijske iskaznice štampan je na formatu A4 i sadrži podatke o diplomatskom i konzularnom predstvaništvu i predstavništvu međunarodne organizacije koje vrši povrat identifikacijske iskaznice; podatke o identifikacijskoj iskaznici koja se vraća; podatke o članu diplomatskog i konzularnog predstvaništva i predstavništva međunarodne organizacije čija se identifikacijska iskaznica vraća; podatke o članovima porodice osnovnog nosioca iskaznice čije se identifikacijske iskaznice vraćaju; podatke o članu privatne posluge čija se identifikacijska iskaznica vraća; potpis rukovodioca predstvaništva; potpis službene osobe Ministarstva kojim se potvrđuje povrat identifikacijske iskaznice.

a) Obrazac broj 4 sadržan je u aneksu V ovog pravilnika.

(2) Obrazac iz stava (1) ovog člana štampan je na tri službena jezika koja su upotrebi u Bosni i Hercegovini, latiničnim i ćirilničnim pismom i na engleskom jeziku.

Član 26.

(Obrasci i izrada identifikacijskih iskaznica)

Identifikacijske iskaznice iz člana 5. i obrasce iz člana 22. i 23. ovog pravilnika, nabavlja odnosno izrađuje Ministarstvo.

Član 27.

(Oštećena identifikacijska iskaznica)

(1) Identifikacijska iskaznica oštećena prilikom izrade se poništava na način propisan članom 17. stav (4) ovog pravilnika.

(2) O poništenim identifikacijskim iskaznicama iz stava (1) ovog člana vodi se posebna evidencija.

DIO TREĆI – EVIDENCIJE

Član 28.

(Evidencije)

(1) Ministarstvo vodi evidenciju o izdanim identifikacijskim iskaznicama.

(2) Evidencija iz stava (1) ovog člana sastoji se od :

- a) registra zahtjeva za izdavanje identifikacijske iskaznice i izdanih identifikacijskih iskaznica;
- b) registra nestalih, izgubljenih, ukradenih i poništenih identifikacijskih iskaznica;
- c) kartoteke zahtjeva s priložima za izdavanje identifikacijskih iskaznica.

Član 29.

(Registar zahtjeva za izdavanje identifikacijskih iskaznica i izdanih identifikacijskih iskaznica)

Registar zahtjeva za izdavanje identifikacijskih iskaznica i izdanih identifikacijskih iskaznica sadrži sljedeće podatke :

- a) Serijski broj izdane identifikacijske iskaznice;
- b) Datum podnošenja zahtjeva;
- c) Ime i prezime stranca;
- d) Datum, mjesto i država rođenja;
- e) Državljanstvo;
- f) Vrsta, broj i rok važenja putne isprave;
- g) Tip izdane identifikacijske iskaznice;
- h) Datum izdavanja i rok važenja identifikacijske iskaznice;
- i) Prethodno izdane identifikacijske iskaznice;
- j) Fotografiju i potpis;

k) Napomena.

Član 30.

(Registar nestalih, izgubljenih, ukradenih i poništenih identifikacijskih iskaznica)

Registar nestalih, izgubljenih, ukradenih i poništenih identifikacijskih iskaznica sadrži sljedeće podatke:

- a) Serijski broj izdane identifikacijske iskaznice;
- b) Datum prijema obavještenja o nestanku, gubitku ili krađi identifikacijske iskaznice;
- c) Ime i prezime stranca;
- d) Datum, mjesto i država rođenja;
- e) Državljanstvo;
- f) Vrsta, broj i rok važenja putne isprave;
- g) Tip izdane identifikacijske iskaznice;
- h) Datum izdavanja i rok važenja identifikacijske iskaznice;
- i) Napomena.

Član 31.

(Kartoteka zahtjeva i priloga za izdavanje identifikacijskih iskaznica)

Kartoteka iz člana 28. ovog pravilnika sadrži zahtjeve s priložima za izdavanje identifikacijske iskaznice, koji su uloženi po abecednom redu po državama šiljateljicama odnosno međunarodnim organizacijama i predstavništvima međunarodnih organizacija, a unutar toga po serijskim brojevima.

DIO ČETVRTI – ZAVRŠNI DIO

Član 32.

(Prelazne odredbe)

(1) Identifikacijske iskaznice izdane do dana stupanja na snagu ovog pravilnika važiće do isteka roka važenja na iskaznici.

(2) Nosilac identifikacijske iskaznice iz stava (1) ovog člana može zamijeniti identifikacijsku iskaznicu i prije isticanja roka važenja stare identifikacijske iskaznice.

Član 33.

(Odredbe o stavljanju propisa van snage)

Stupanjem na snagu ovog pravilnika stavlja se van snage «Odluka o uslovima i postupku izdavanja identifikacijskog dokumenta maloljetnim članovima porodice stranog diplomatsko-konzularnog osoblja akreditovanog u Bosni i Hercegovini» broj: 08/1-21-INT-2690/07 od 18.07.2007. godine.

Član 34.

(Stupanje na snagu)

Ovaj pravilnik stupa na snagu osmog dana od dana objavljivanja u “Službenom glasniku BiH”, a primjenjivaće se od 30.04.2008. godine.

Broj: 11-1-385/2008

Sarajevo, 11.02.2008. godine

Ministar vanjskih poslova Bosne i Hercegovine

Sven Alkalaj